

# Anc ha l'uniun nagin president

## Federaziun grischuna dal sport da tir

DA GION NUTEGN STGIER / ANR

■ **Da chattar ina persuna che stat al timun da l'uniun che reunescha ils tiradurs da noss chantun è er suenten in onn betg stà pussaivel. Ad interim vegn la federaziun vinavavt manada da Walter Burkhardt, il vicepresidente.** Malgrà la blera naiv è in bel dumber delegads da las 130 societads da tir da noss chantun s'inscuntrà a Valendau per assister a la radunanza 2016 da la Federaziun grischuna dal sport da tir (BSV). Dasper intgins represchentants da la politica, sco per exempel cusseglier guvernativ *Christian Rathgeb* era er preschent brigadier *Franz Nager*, il cumandant da la la Brigada d'infanteria da muntogna 12. En ses pled da baivegni ha *Walter Burkhardt*, il vicepresidente da l'Uniun chantunala dals tiradurs, ditg che sin champ sportiv saja l'onn 2015 stà in onn da success. Menziunà ha el cunzunt ils success dals tiradurs grischuns tar la Festa federala da tir 2015 en il Vallais. La gruppa da pistola program B 50 m ha gudagnà la concorrenza dals chantuns e sin la distanza da 300 m, arma da sport, èn ils tiradurs grischuns vegnids terzs. Remarcabel è lura segir er l'emprim post da *Hermann Jemmy* da Castrisch tar il campinadi svizzer arma da militar 300 m duas posiziuns.

### President e vicepresidente ad interim sa retiran en in onn

Aposta per la tschertga dad in successur per *Marcel Suter*, el ch'era stà dal 2006 fin il mars 2015 president, aveva il BSV nominà ina cumissiun per chattar in successur per il president partent. Fin tar la radunanza da delegads da sonda passada a Valendau èsi dentant betg reüssi a la cu-



**Suenten il Grischun central che ha organisà il 2012 la Festa da tir chantunala vegn la Surselva ad organisar la proxima e quai il zercladur 2018.**

FOTO G. N. STGIER

missiun da chattar ina persuna che surpiglia quel uffizi. Sin fundament da quella realitad è *Walter Burkhardt*, il vicepresidente ad interim, stà pront da star anc per in onn a la testa da la Federaziun grischuna dal sport da tir. Cun applaus han ils preschents er confermà il tiradur da *Domat* en quel uffizi. Er per l'uffizi dal vicepresidente ad interim e schef disciplina tir/arma, *Bernhard Lampert*, èsi betg stà pussaivel da chattar ina persuna che surpiglia quella incumbensa, uschia che er per quels dus posts han ils delegads confermà el. En in onn vegnan dentant *Burkhardt* sco er *Lampert* a sa retrair definitivamain.

### Bunamain 18 000 francs per la nova bandiera

La bandiera chantunala ha fatg ses servetsch ed è vegnida remplazzada entras

ina nova. Custà ha la nova bandiera bunamain 18 000 francs. Fin oz ha il BSV retschet prest 8000 francs sco donaziun per la la nova bandiera ch'è vegnida inaugurada tar la radunanza da delegads a Valendau. En l'avegnir vegn il Tir da la Chalavaina ad avair lieu mintg'onn, dentant be a Müstair ubain a Tavau e betg pli a Cuir, Glion e Samedan. La Festa da tir chantunala 2018 ha lieu il zercladur en Surselva ed a la testa dal comite d'organisaziun stat il deputà *Marcel Caduff*.

Schef da tir daventa *Hubert Tomaschett*. La stagiun da tir 2016 cumenza cun il tir d'avertura a l'entschatta d'avrigl en il Partenz. La proxima radunanza da delegads da la Federaziun grischuna dal sport da tir ha lieu il mars 2016 ad Alvagni.